

DISSERTATIO INAUGURALIS

D E

# CANCRO MAMMARUM,

Q V A M

DEI OPTIMI MAXIMI AUSPICIIS,  
GRATIOSISSIMI ORDINIS MEDICI CONSEN-  
SU ET AUTORITATE,

S U B P R Æ S I D I O

NOBILISSIMI, AMPLISSIMI atq<sup>ue</sup> EXPE-  
RIENTISSIMI

DN. D. CHRIST. LUDOV.  
WELSCHII,

FACULTATIS MEDICÆ ASSESSORIS,

PRO LICENTIA

SUMMOS IN ARTE MEDICA HONORES

AC PRIVILEGIA DOCTORALIA CAPESSENDI,

DIE XV. NOVEMBR. ANNO MDCCIX.

PLACIDÆ DISQUISITIONI

OFFERT

M. GEORG. FRIDERIC. Ruttenberg /

LIPS. MED. BACCAL.

---

L I P S I Æ,

LITERIS BRANDENBURGERIANIS.









§. I.



**Exum sequiōrem longe pluri**

bus quam virilem, ærumnis obnoxium esse, documenta ostendunt quam plurima. Quot enim mala, quot læsiones vel solas mammas infestare solent? Dum hæ modo abundantia lactis obruuntur, modo penuria ejusdem laborant, mox indurescunt, inflammantur, ulcerascunt: papillæ jam fissuras, jam excoriationem, jam alios affectus satis molestos incurrunt. Nullus tamen affectuum mammarum gravior est, quam canerosa earundem induratio vel exulceratio, & quidem tanto gravior, quo frequentior occurrit, imo quo rarius perfectam medelam admittit, sed efficacissima etiam præsidia ac remedia eludit. Licet autem irrita videri possit opera, multa de ejusmodi affectu verba facere, ubi finis intentus, sanatio nimirum, obtineri nequeat. Interim cum & dignotio accurata & prognosis vera Medico omnino sit necessaria, sæpe etiam præservatio aut mitigatio molesti hujus & periculosissimi mali locum habeat: non omni fructu laborem hunc cassum fore confido, dum speciminis Inauguralis loco *Cancrum Mammarum* pertractandum aggredior. Quod ut ex voto cedat atque succe-



dat, summi Numinis auxilium clementissimum & Benevoli Lectoris favorem, atque in erroribus, si forte celsitavero, condonandis facilitatem submisit exoro.

## §. II.

Vox Cancrī est πολύσημοις, in nativa enim & magis propria significatione denotat amphibium certum crustaceum; deinde Astronomi hac appellatione signum illud cœleste in Zodiaco occurrens indignant, post cuius ingressum sol motu veluti retrogrado descendere solet. Porro fasciæ quandam speciem, quæ capiti convenit, & in plures partes, cancrorum pedes referentes, scissa est, chirurgi cancrī titulo insignant. Receptissima autem vocis hujus significatio in arte Medica innuit quendam tumorem præternaturalem, qui, quoniam venas in ambitu inflatas & turgidas, ac pedes cancrī divaricatos referentes exhibet, aut quoniam ad ακμήν ductus vel exulceratus, sublivido-fuscum repræsentat colorem, denominationem suam hinc reportavit. Et illius derivationis fundamentum vero similis & convenientius apparet præ illo, quod *Forestus in Obs. Chirurg. Libr. II. obs. 5.* suggerit, qui tumorem illum scirrhosum eam ob causam Cancrum appellari putat, quoniam hoc malum pariter, quod semel apprehendit, tenaciter, sicut cancrī soleant, teneat atque premat. Præter hanc autem, quam recensuimus, usitatissimam denominationem, aliæ adhuc occurrunt appellationes, quibus passim a Scriptoribus salutatur Cancer. Sic nonnullis illum carcinum, nec non tumorem cancrosum appellare placet, nonnulli quoque illum Carcinoma, Phagedænam, Lupum nuncupant. Veteres vero eum Nolime tangere vocasse *Dolæus in Encyclop. Chirurg. Libr. V. Cap. VIII.* perhibet, eam forte ob causam, quia malum hocce truculentum sæpiuscule tangendo exasperari solet.

## §. III.



## §. III.

Præmissis igitur illis, quæ ad nominis evolutionem faciunt, rei ipsius essentia quo melius innotescat, opus est, ut sequentem addamus definitionem. Est cancer tumor præternaturalis, partes ut plurimum molliotes spongioso-glandulosas infestans, durus, inæqualis, dolorificus, sublivido-fuscus, venas in ambitu turgidas & inflatas habens, puncturas subinde nec non lancinationes satis acutas formans, in ulcus tandem degenerans malignum valdeq; dolorificum, late partes vicinas depascens, cum labiis præduris & inversis, foetore intolerabili, dolore ineffabili, febre lenta, saniem nigram vel fulvam loco puris laudabilis stillans, quandoque etiam sanguinem in larga satis quantitate plorans, miseras ægras ad mortem usque comitans, imo recto gradu deducens.

## §. IV.

Subjectum & locus, ubi truculentum illud malum sedem suam occupare solet, sunt, uti ex definitione supra data patet, spongioso-glandulosæ partes, & illud assertum nostrum multæ confirmant observationes, quarum nonnullas impræsentiarum recensere nobis liceat. Sic *Forestus Libr. 7. Obs. Chirurg. 17.* de excrescentia cancrosa supra oculum ulcerata, in viro sexagenario illoque quoque malo defuncto, literas nonnullas consignavit; & de cancro horrendo & stupendo, in principio multos fallente, verrucæ non absimili & sub axilla latente *Panarol. pent. 4. Obs. 33.* scribit. Oculum quoque ab illa tyrannide immunem non mansisse, *Ephemerid. N. C. Dec. II. An. 6. obs. 72.* testantur, ubi *Valentinus* de periculoso cancro in oculo virginis, extra orbitam jam ob nimiam inflammationem acto, refert, quæ quoque illo malo mortem subire fuit coacta. Nares illum quoque infestasse *51. observatio Borelli Cent. II.* docet, qui rusticum cancro narium obsessum in medium profert, illumque solo onopordi contusi



succo curatum fuisse ingenue fatetur. *Hildanus Obs. Chirurg. Cent. I. obs. 30.* tria enumerat exempla illorum, qui in prima juventute in gingivis cancrösam excreſcentiam ſumma cum moleſtia & vitæ tandem cum morte commutatione pertulerunt, & *Cent. 3. obs. 84.* de cancro linguam obteſſo hiftoriam notatu dignam a Valentino Rolando communicatam ſuggerit. Pariter *Barthol. Hiſt. Anat. 26. C. 1.* de genarum cancro mentionem facit. Si quis quoque *Stalpart van der Wiel C. I. obs. 87.* evolvat, inveniet ibi exemplum fungi cancroſi, in interiore matricis parte hærentis, & porro *obs. 88.* fceminam cancro meatus urinarii laborantem in medium producit. *Rhodus Cent. III. obs. 45.* ſatis memorabilem refert hiftoriam, de muliere mediæ ætatis, cujus uterus, cum inſigni tumore aquoſo teſticuli, cancroſus apparuit, & *obs. 39.* pariter de mediæ ætatis ruſtico tradit, quod ille ex gonorrhœa ante quinquennium contracta præputium cancroſum reportaverit poſt concubitum cum uxore, dum ei menſes fluerent. Quem tandem *Ephemerides N. C.* evolvere non piget, multa exempla reperiet eorum, qui cancro laborarunt. Sic *Dec. I. Ann. I. obs. 99. Herod. a Totenfeld* memorat de viro 42 annorum, qui repentinam mortem ex cancroſo pancreatis ulcere eſt aſſecutus; & *Dec. II. An. 3. obs. 125. Murætus* ægrum XXII. annorum ſiſtit, qui, cum rem cum meretrice habuiſſet, biſq; lue venerea infectus ſalvatione liberatus eſſet, dein vero tandem penis cancerum contraxiſſet. Quandoque tamen quamquam rariſſime loca ſane inſolita cancerum infeſtare oſtendunt obſervationes. Sic *Hildanus Cent. I. obs. 89.* meminit de viro, qui in natibus tumorem cancroſum, vehementibus & gravioribus Symptomatibus ſtipatum, per multos annos eſt perpeſſus, & *Tulpius Obſ. Med. Libr. IV. Cap 38.* de calculoſo refert, quod ille urinam per anum reddiderit, nec non veſicæ cancro laboraverit, & denique *Ephemerid. N. C. Dec. I. An. I. obs. 5.* de puerulo unius anni tradunt, quod cancro dentis laborans ſupremum ſubiverit diem.



## §. V.

Frequentius tamen imo sæpissime Cancer Mammas  
fœminarum infestare solet. Cujus mei asserti non solum te-  
stes esse possunt innumeræ prorsus illæ observationes, quas  
*Amatus Lusitanus*, *Hildanus*, *Sennertus*, *Schenckius*,  
*Sculletus*, *Bartholinus* aliique studiose collegere; sed ex-  
perientia quotidiana hujus rei veritatem extra omnem dubi-  
tationis aleam collocat: imo ne mamillæ quidem virorum,  
uti aliis in circumstantiis aliquando mammas muliebres æmu-  
lantur, ab hoc malo immunes fuisse observatæ fuerunt, teste  
*Hildan. Cent. 1. obs. 89.* Quare abs re non fuerit, si nunc  
in mammarum structuram paulo curatius inquiramus. Mam-  
mæ itaque secundum legem numerantur duæ, fieri tamen  
quandoque solet, ut natura fœminis tres pluresve mammas  
concedat. Sic *Thom. Barth. in M. N. C. Dec. I. An. 2. obs.*  
*72.* mentionem facit cujusdam mulierculæ, cui tertia mam-  
ma in dorso conspicua sine papilla eminuit, & *Joh. Waleus* in  
quadam fœmina tres mammas se vidisse sancte testatur: porro  
*Olaus Borrichius*, nec non *Gerh. Blasius* totidem mamillas  
in certa quadam fœmina observarunt, & *Lanzonius* Ferrariæ  
in fabri lignarii uxore tres pariter mammas invenit. Vid. *E-*  
*phemerid. N. C. Dec. II. An. 9. obs. 55.* His observationibus  
quoque adjungi merentur exempla fœminarum trimammia-  
rum a *Bonetto in Medic. Sept. P. 2. p. 155.* adductarum. Has  
tamen omnes adductas raritate superat observatio illa *Ca-*  
*brolii*, ubi affirmat, se in quadam muliere quatuor com-  
spexisse mammas. Solent autem mammæ pro justo debito-  
que situ pectus agnoscere, natura tamen quandoque quan-  
quam rarissime illas aliis & insolitis locis affigit. Sic *Mu-*  
*ralt. in M. N. C. Dec. II. An. I. obs. 88.* historiam lectu notatu-  
que dignam de puella quadam recenset, quæ ex matris gravi-  
dæ phantastica impressione, cum nempe illa uber vaccinum  
in horreo quodam suspensum vidisset, vaccino pariter ubere  
cum



cum tribus papillis ad inguen dextrum prædita fuit, illud quoque per 19 annos ferre fuit coacta, ubi postea monstrificum illud uber post illius mortem amputatum 73 libras civiles pependit. Hæc autem prout non solum rariora, sed etiam pro naturæ erroribus habenda sunt: ita ordinaria utique illarum sedes omnino est anterior pectoris pars, & semper musculis pectoralibus sunt superinstrata. Ita ut in quolibet latere una mamma non tam in ornatus quam commodioris lactationis gratia sit posita. Figuram illarum quod concernit, hæc pro diversa ætatis vitæque constitutione variare solet; rotundam enim figuram dimidiique globi faciem repræsentat in fœminis junioris & mediæ ætatis, cum e contrario in gravidis & lactantibus ob frequentiore lactis secretionem mammarumque intumescuntiam, inæqualē nanciſcantur figuram organa illa lactifera; in senibus vero, quando mensium fluxus cessare incipit, mollescent, flaccescunt, nec præter pelles quicquam quam papillas conspectui sistunt. Magnitudinem quod spectat, illam rite determinare non possumus: pro regionum enim diversitate diversa quoque mammarum observatur magnitudo. Sic *Dionis in Demonstr. Anat. 5.* de pectoris partibus p. 252. scribit, quod Indicæ Siamensesque fœminæ adeo prolixas habeant mammas, ut illas & super humeros pro lubitu rejicere possint. Porro pro subjectorum differentia mammarum moles discrepat, reperiuntur enim mulieres, quibus natura exiguas, aliæ, quibus easdem magnas efformavit. Sic *Schenck. Observat. Medicinal. Libr. 2. fol. 331.* de muliere prolifera & quandoque uno partu gemellos edente scribit, quod tantum mammis virilibus fuisset exornata, & nullum est dubium, quin hodiernis temporibus multæ mulieres exiguis mammis præditæ occurrant. De mammis vero stupendæ magnitudinis *Schenckius* cum primis l. c. memorat, quod virgo juvencula brachiorum latera ventrisque partem superiorem illis tegere potuisset, & de prodigiosa harum magnitudine ad 30 librarum pondus accedente *Borell. Cent. I. obs. 48.* historiam memorabilem



bilem suggerit, uti de incremento & ingenti mammarum mole *Salmuth. Cent. II. Obs. 89.* nec non *Th. Barthol. Histor. Anat. 46. Cent. 3.* nonnulla proferunt exempla. Justam autem & debitam illarum magnitudinem Physiologiæ scrutatores ab ætatis discrimine deducere allaborarunt; nec immerito: in puellis enim, infra 14 annum constitutis, præter papillas nullam aliam turgescientiam cernimus; annum vero 14 supergressis mensiumque fluxui obnoxiiis, illas sororiari semique globuli figuram præ se ferre, nec non duras ac solidas evadere animadvertimus.

### §. VI.

Quia autem in mammarum meditullio exilis præminentia conspicitur, quæ multa insuper commemoratu digna exhibet, Anatomici organon lactiferum in mammam proprie sic dictam & papillam dispecere fuerunt commoti. Mamma itaque proprie sic dicta, quoad faciem externam cute cuticula tecta cingitur, qua detecta interiora penetramus, ibique substantiam, varia vasa, nec non aliqualem pinguedinis portionem invenimus. Substantiam quod attinet, illam plurimi Anatomicorum pro glandulosa habuerunt. Exquisitissimus autem hujus seculi Anatomicus *Frid. Ruyschius in Thes. Anat. III. p. 31. ut & in Ep. Problem. 15. p. 10.* illam vasculosam atque ex meris vasis sanguifluis lactiferisque conflata esse adstruxit. Quoniam vero & glandulæ sunt nonnisi variorum vasorum congeries, non video, quid obftet, quo minus sic utrorumque sententiam amplectamur: glandulas enim adesse lactis secretio luculenter testatur. Quemadmodum autem glandulæ & aliæ partes certis suis vasis gaudent, sic & hic vasa advehentia, revehentia, ut & excretoria habemus. Ex advehentium numero primum arteriæ mammarie tum externæ tum internæ oculis obveniunt, quoniam aliæ externam, aliæ internam uberum partem pervadunt atque irrorant. Priores seu

B

externæ



externæ ab axillaribus ortum suum deducunt, & mammarum nutritioni cumprimis inservire *Dionis in Demonstr. Anatom. V. de pectoris partibus p. 255.* evincit. Posteriores autem seu internæ a ramo subclavio prædeunt, quæ omnes ad ipsas tendunt glandulas, ibique sanguinem arteriosum pro secernendo lacte deponunt. Advehentium vasorum numero & nervorum rami, tum a quinto spinali sive dorsali pari, tum a plexu circa claviculas, provenientes per omnem glandularum substantiam disseminantur, & tandem in extremas papillas colliguntur, qui non solum sensum exquisitum largiuntur, sed & succi lactei secretionem promovent. Revectioni destinatæ sunt venæ mammaria & externæ & internæ, quarum priores in thoracicas, posteriores vero in subclavias sanguinem superfluum reducunt. Venæ lacteæ seu ductuli lymphatici pariter inter vasa reducentia referuntur, quas omnes in ductum thoracicum lateraliter inseri *Verheyen* cum aliis celeberrimis Anatomicis arbitratur. Vid. *ej. Anatom. corporis human. Tr. III. Cap. I. p. 230.* Præter nominata vasa alii peculiare ductuli, tubuli lactiferi Anatomicis nuncupati, conspiciuntur, qui non solum glandularum excretorii, sed & receptaculi munere funguntur, quoniam non solum materiam lacteam a glandulis recipiunt, sed & intermissæ suctionis tempore ad copiosam usque cumulationem conservant. Illi ductuli originem suam glandulosæ mammarum substantiæ debent, & furculis admodum tenuissimis sensim coeuntes, diversos tandem truncos, in papillam osculis utcunque patentibus desinentes, constituunt, vid. *Verheyen l. c.* His quibuscunque vasis atque glandulis copiosa pinguedinis portio est intertexta, cum forte in finem, ut glandularum nimirum interstitia repleat, simulque vasa iis copiosissime interposita aliqua ex parte sustentet.



## §. VII.

Antequam Anatomicam mammarum explicationem plenarie relinquimus, non possumus non antea de papilla nonnulla facere verba. Hæc situm suum naturalem in media & superiore mammæ parte agnoscit, & in quolibet ubere unica tantum apparet papilla. Duas quidem in quolibet ubere non multum inter se distantes se conspexisse *Borellus Obs. Med. 49. Cent. I.* gloriatur; ast casus rarissimus. Hæc papilla in virginibus pallido, gravidis & nutricibus obscuro, vetulis autem lurido circulo, areolæ nomine insignito, circumducitur, in quo papillares quædam protuberantiæ spectantur, ex quibus interdum humor quidam limpidus emanare solet. Substantia, qua pollet, penis glandis substantiæ non absimilis est, ideoque illam Anatomici pro fungoso spongiosa agnoscunt, imo non immerito papillam *Bidloo T. 19.* fasciculum tubulosum vasorum præsertim lactiferorum, glandulosa textura interne & externe obvolutum, nuncupat, & observarunt curiosi, illorum vasorum ostiola in suprema papillæ parte numero prorsus infinito reperiri. Porro in papilla omni sanguine lacteque depauperata, inflata, atque in liberiori aere exsiccata duplicem fibrarum seriem, ipsi integumento firmiter annexam, microscopii subsidio deprehenderunt nonnulli, quarum alteram e majoribus reti-formibus, alteram vero e subtilissimis fibris regularem ordinem servantibus contextam, exiguisque admodum variæ formæ foraminibus pertusam esse Excellentissimus *Pauli, Patronus & Præceptor meus* ætatem devenerandus in *Not. ad Joh. van Horne Opusc. Anat. p. 263.* solerter annotavit. Hincque demonstratu difficile non esse arbitramur, cur nempe papillæ ex contrectatione & infantum suctione persacile erigantur, quia sanguis prompte æque ac in penis substantia, copiosior copia fibrarum interstitia distendit.



## §. VIII.

Ufus Mammarum consistit in eo, ut portionem chyli, sanguini per ductum thoracicum affusi, ab eodem iterum separent, qui postmodum a purpureo hoc latice denuo sequestratus, atque in peculiaria vascula congestus, mox nativa sua albedine dulcique sapore sese prodit, usitataque lactis appellatione insignitur. Lac autem chylum esse parum adhuc alteratum, testantur qualitates illæ a cibo potuque assumpto chylo impressæ, quæ etiamnum in lacte superstites observantur. Ita v.g. nutrix, hausto purgante vel alio medicamento, vim illam medicamentosam tenello suo alumno mediante lacte communicat. Lac a nimio absinthii usu sapore summe amaricante infectum, imo lactationi ineptum redditum fuisse *Borrichius* annotavit in *Act. Hassn. Vol. II, obs. 162. p. 165.* Neque etiam rei œconomicæ peritis ignotum est, quam facile lac bubulum, imo etiam butyrum ex tali lacte paratum, odorem & saporem ingratum alliaceum contrahat, si vaccæ allio ursino, aut etiam scordio copiosius tum pastæ fuerint. Interim liquor hic lacteus ob minus arctam particularum, ex quibus constat, mucido-pinguium cum aqueis unionem, harumque successionem facillimam, non solum prompte admodum grumescentiam & coagulationem caseosam incurrit, sed & corruptioni acido-salsæ facillime fit obnoxius.

## §. IX.

Non sine rationibus satis prægnantibus paulo latius hæc deduximus. Siquidem ex glanduloso-tubulosa hac textura mammarum, earumque officio, quo lactis penuaria a natura constituta sunt, genuina ætiologia innotescit, cur malum hoc mammis adeo familiare & fere domesticum existat. Inde enim ad oculum patet, quam facile sanguis in angustis his meatibus



atibus subsistere, coagulari, atque cum lacte, pariter stasin aco-  
remque concipiente, sociam corruptelam subire possit. Et in  
hac corruptione putrido - salsa malignitatis cancrôsæ naturam  
consistere, pleræque circumstantiæ evincunt. Sanguis enim  
motu suo progressivo privatus, hincque tanto vehementiorem  
motum intestinum concipiens nullam aliam corruptionis spe-  
ciem promptius subit, quam sphaceloso - putredinosam.  
Lympha contra in corruptelam salsam, rodentem, & Lac speci-  
atim in acescentem grumescentiam propendet. Dum igitur  
vel a causis externis violentis v. g. duriori allisione, pun-  
ctura, dolorifica vellicatione crispatoria mammarum, vel et-  
iam a causis internis, sanguinis spissitudine præternaturali, aut  
particularum terrestrium acidarum in eo abundantium copia, ac-  
cedente forte animi commotione pathetica, imprimis vero ter-  
rore repentino, sanguinis stasis & coagulatio in angustis illis ca-  
nalisculis porulisq; contingit, emergit inde nodulus duriusculus,  
ab initio satis exiguus, vix ciceris, pisi aut nucis avellanæ magni-  
tudinem superans, ob spasticam tamen fibrarum vicinarum stri-  
cturam, leves subinde puncturas, ardores & lancinationes per  
vices recrudescentes formans. In hoc statu sæpe diu satis ma-  
lum persistit, donec majori sensim particularum viscidarum  
copia inibi collecta & coacervata, plures successive tubuli ob-  
struantur, imo ad rupturam usque infarciantur, ut hinc non  
solum tumor augeat, atq; ad prodigiosam sæpe molem excre-  
scat; sed & a sanguine coagulato, per cutem transparente, colo-  
rem lividum, plumbeum induat, vasaque circumjacentia pari-  
ter livorem & varicosam turgescientiam incurrant. Nihilo  
minus & tunc in statu utcunque tolerabili diu interdum per-  
severat: nisi quod dolores pungitivi, ardentes, rodentes  
& crebrius & vehementius infestent. Postquam vero per  
improvidam emollientium vel acriorum irritantium applicati-  
onem, aut etiam internum MSnæ orgasmum humo-  
rum



rum tenuiorum affluxus, & hoc modo coaguli spissioris dilutio concitatur: coercita hactenus fermentativo - putredinosa sanguinis indoles sese exerit, particulæque ejusdem sulphureæ mobiliiores, e nexu reliquarum exsolutæ in vicinas partes contagium diffundunt. Inhibetur equidem quoad antenus putredinosa hæc corruptio, quo minus adeo præcipiti progressu, ut in sphacelo contingit, proserpat, per præsentiam feri subfalsi & caseosam lactis mucescentiam. Interim enascitur hinc acerrima ac pene caustica acido - corrosiva virulentia, non solum tubulos, quibus inhæret, exedens, sed & partes circumjacentes late depascens, indeque dolores atrocissimos, foetorem intolerabilem & fere cadaverosum, saniei nigricantis, aut ichoris flavescentis vel subcruenti, imo largam sanguinis sinceri ex vasis erosione, emanationem inferens. Imo communicatur tandem labes hæc toti massæ humorum, resorptis subinde per vasa venosa & lymphatica particulis ejusmodi corruptis, indeque universalis dyscrasia sanguinis, spirituumque perturbatio summa exoritur, quæ non solum febrem lentam, sed & concurrente imprimis & augescente dolorum atrociam, vigilias assiduas, anxietates summas, animi crebriora deliquia, & denique omnium ærumnarum finem, mortem inducit.

## S. X.

Causa igitur proxima mali adeo efferi imo feralis est stasis sanguinis in tubulis porulisque substantiæ glandulosæ mammarum, cum latice seroso - lymphatico & speciatim quidem hic chyloso - lacteo, pariter ibidem stagnante & acescente, corruptionem putrido - falsam, quin acido - corrosivam subiens. Unde non male *Heurnius Comment. in Hippocrat. Aphor. 38. Sect. VI.* duplex in cancro venenum, unum putrefactivum, alterum corrosivum accusat, eaq; sese mutuo exasperare tradit. Pullitiem verminosam in ejusmodi colluyie humorum computrescentium propullulare posse;



posse, imo interdum actu provenire, non equidem diffitemur. Prostant enim variae observationes, quæ verorum vermiculorum præsentiam ac proventum in ulceribus cancris ipsa autopsia comprobant, vid. *M. N. C. Dec. I. Ann. 2. Obs. 148. p. 232. it. Append. ad Ann. 4. Dec. II. Obs. 22. p. 199.* nec non *Plater. observ. Libr. II. p. 533.* Semper tamen progeniem verminosam adesse, imo ipsum cancerum nil nisi innumerorum vermiculorum mirifice fecundorum farraginem existere multa sunt, quæ dissuadeant. Et negant hoc rotunde *Dolens in Encyclopæd. Medico-Chirurg. Libr. V. Cap. 8. p. 1158. ut & Musitanus in Trutin. Medico-Chirurg. P. II. Cap. 23.* provocant. que ad ocularem inspectionem carnis talis corruptæ, ex ulcere cancroso excisæ, etiam per microscopium adjutam, quæ nullos vermiculos, sed eorum loco humorem viscidum gelatinæ similem visui obtulisset. Imo si vel maxime numerosa talis verminosa soboles adesset; vix tamen causæ, sed producti solummodo rationem haberet.

### §. XI.

Causæ remotæ seu antecedentes possunt esse sanguis justo spissior & copiosis particulis terrestribus prægravatus, lymphæ præter naturam viscidior, ac serum acrius, sæpe per actuales ulcerationes in aliis partibus hinc inde productas sese prodens, imprimis vero difficilis lactationis successus & sæpius jam tolerata a lacte coagulascnte in mammis incommoda, fluxus menstrui suppressio, aut intempestiva cessatio. Quibus tandem causa aliqua procatactica v. g. ulcerum talium, in parte aliqua diutius gestatorum & valde manantium, præpropera oclusio, ipsius mammæ violenta allisio, durior ac dolorifica contrectatio, terror ex improvise incussus &c. accedat; opinione citius truculenti hujus mali genesis absoluta erit.

### §. XII.



## §. XII.

Specimen hujus rei luculentissimum exhibet D. *Joh. Laur. Febrinus in M. N. C. Dec. II. An. ult. Obs. 76.* ubi mulier, fluxu seroso oculi, partesque vicinas subjacentes erodente, diu afflicta, satis tamen tolerabiliter se habuit, quamdiu fluxus mensium succedebat, vel gravida erat, ita ut per 20 annorum spatium parum incommodi inde sentiret, aut si forte dolores ingruerent, adhibitis remediis leniter evacuantibus, sudoriferis ac menses moventibus, prompte ab iisdem rursus liberaretur. Postmodum autem vidua facta, cum in multo exprimendo occupata esset, paulo fortius partem inferiorem mammæ sinistræ premit. Remanet inde dolor in dicta mammæ parte, levior quidem, diutius tamen persistens, qui cum anguem in herba latentem harum rerum peritis facile proderet, mitioribus laxantibus, diaphoretico-diureticis, VSne mitigatus, non tamen sublatus fuit. Exigit ita in statu satis tolerabili annum dimidium. At vero cum fluxus serosus in facie evanesceret, menses etiam per ætatem jam cessarent, subito mutatur scena. Tumor, qui in principio vix avellanæ magnitudinem æquabat, veloci admodum progressu indies augmenta capiens, tandem in ulcus phagedænicum degenerat. Cui licet optima & efficacissima remedia tam externa quam interna opponerentur, vix tamen coerceri potuit fævientis hujus mali ferocia. Tandem ægra dolorum atrocitate victa, spretis remediis methodo debita hactenus adhibitis, concredit sese Chirurgus peregrino, qui per cauterium potentiale malum hoc indomitum perdomare audet, sed cum eventu adeo sinistro, ut post pauculos dies colli inflammatione, deglutiendi difficultate, omnimoda appetitus dejectione, summa virium debilitate corripereetur, neque etiam, utut seposita & omissa rursus causticorum applica-



plicatione, ullis remediis sublevari posset, sed nonnisi in morte demum dolorum suorum constans levamen inveniret.

## §. XIII.

Possemus & nos historiam asserere non multum dissimilem. Cancri mammarum ex ulcere pedis, difficiliorem mensium successum insecuto & diu satis tolerato, tandem vero consolidato, post plenariam Catameniorum cessationem enati. Fœmina melancholico-cholerica, mensium fluxum jam inde a primis pubertatis annis & justo parciolem & valde inordinatum experta, hinc in juventute sua gutta rosacea insigniter defœdata, ast per sectionem venarum raninarum eadem ex voto rursus liberata, frequentiore postmodum in ætate consistente erysipellate pedum, post levem excandescientiam aut terrorem, affligi solita, incurrit aliquando in puerperio tumorem pedis dextri, quem mulieres adstantes pro erysipellate albo habent, variisque remediis empiricis oppugnant, sed nimis officiosa sua sedulitate in ulcus valde dolorificum convertunt. Quod tumendo, dolendo, manando per plures annos ægram afflixit, nec vario remedium apparatus, imo ne quidem usu thermarum Carolinarum (licet menstruum fluxum ex voto revocassent) per sanari potuit, tandem tamen per venæsectionem in opposito pede institutam, fonticulumque in brachio excitatum, conjunctumque decocti lignorum usum consolidatum fuit. Vixit ita sic satis tolerabiliter per sexennium circiter, frequentioribus venæsectionibus ac scarificationibus, fonticulique asservatione sublevata. Attamen cum fluxus

C                      men-



menstruus justo maturius cessaret, ipsaque ex vitæ genere laboriosiore ad otiosius transiret, novo eoque graviore malo fuit obruta. Nimirum dum aliquando improvise terrore cum intercurrente gravi indignatione percellitur, sentit inde dolorem repentinum punctorium in mamma sinistra, ac si cultro acuto transfigeretur, quem tamen utpote transitorium negligit. Post aliquot septimanas nondum exiguum in mamma prædicta animadvertit, qui licet non adeo eximie doleret, pedetentim tamen augmentum capiens, peioris eventus metum incutit. Perterrita inde undique, ut fieri solet, auxilia anxie conquirat. Omnia tamen indies in pejus ruunt, tumorque mammæ sponte aperitur. Quo viso magis adhuc consternata, denuo ad thermas Carolinas confugit, sed reddit afflictior, ulcere quotidie latius serpente, atque intra spatium vix semestris integram mammam depascente, quocum etiamnum misera miserrime conflictatur.

#### §. XIV.

Differentia Cancris, seu distinctio ejusdem in species diversas, diversitatæ potissimum causarum ac symptomatum, quæ modo retulimus, superstruitur, imo ex dictis sua quasi sponte fluit. Videlicet Cancer est vel primigenius & primo statim exortu talis, vel aliis benignioribus tumoribus ulceribusve demum superveniens, quæ inde postmodum ulcera cancrofa, Krebs- & Schâden nuncupantur. Dein alius cancer est evidens, partes exteriores, faciem, labia, penem, mammas infestans; alius vero latens, qui partes interiores, palatum, uterum,

vesi-



vesicam urinariam obsidet. Porro alius est occlusus adhuc & nondum exulceratus, solo tumore, ardore, lancinatione molestus: alius vero exulceratus, qui corrosione, foetore, hyperfarcosi, sanguinis profusione, ægras ad internecionem usque discruciat. Cancer mammarum in specie est vel mobilis adhuc, qui nec musculos substratos pectorales atque intercostales, neque etiam glandulas vicinas subalares infecit; alius vero immobilis, latiusque ac profundius jam diffusus. Et hæ postremæ duæ distinctiones maximum in Praxi habere usum deprehenduntur: his ipsis quippe & prognosis & legitima tractatio therapeutica magna ex parte innititur.

## §. XV.

Equidem quævis Cancris species, ex unanimi cordationum Practicorum consensu, malum est re vera fonticum, atque ut satis apposite dixit *Musitanus in Trut. Medico - Chirurg. P. II. Cap. 23.* Medicorum opprobrium, ægrorum tormentum. Siquidem mitiora remedia spernit, fortioribus exasperatur. Exulceratus tamen occulto, seu non ulcerato longe truculentior existit, multoque citius ægrum in tumulum præcipitat, imo teste *Hildano Tract. de Gangr. & Sphacel. Cap. 7.* sæpe ne mitigationem quidem admittit. Occlusus ex adverso, qui cutem nondum exedit, neque in ulcus apertum degeneravit, sæpe diu satis in statu admodum tolerabili persistit: ita ut *Amatus Lusitanus Cent. III. Curat. 32.* testetur, se novisse nonnullas mulieres, caneros in mamillis habentes, quæ solo bono vitæ ordine, absque ullo medicamentorum topicorum irritamen-



mento, per longum tempus vixissent ita incolumiter, ac si nullum paterentur morbum. Licet vero in præsentī malum satis leve videatur; in futurum tamen semper est periculo plenissimum, atque post longam quoque annorum seriem, & juxta *Tulpii Observationem*, quam *Lib. I. Cap. 47.* tradit, etiam post 50. annorum moram lethiferæ exulcerationi obnoxium. Tumor cancrusus exiguus adhuc, aut mobilis ad minimum, sectione perita feliciter sæpe extirpatur. Qui vero arcte nimis musculis substratis, vel ipsi periostio costarum annexus est, aut glandulis adjacentibus axillaribus contagium jam adspersit, ne hoc quidem, utut extremo remedio, tolli amplius potest. Cancrum exulceratum malum contagiosum esse, virusque suum non solum communis, sed eminus quoque disseminare, contra receptam sententiam negativam adstruit solide *Tulpius Libr. IV. Obs. 8.* & binis exemplis *l. c.* confirmat. Imo nec occlusum seu non exulceratum hujus culpæ insontem esse, evincit observatio *Hildani Cent. II. Obs. 78.*

#### §. XVI.

Therapeutica Canceri tractatio tria præcipue intendit, aut radicalem ejusdem extirpationem, aut providam ab ulteriore incremento, vel imminente exulceratione præservationem, aut blandam mali, jam ad *ἀκμὴν* ipsamque ulcerationem perducti, mitigationem.

#### §. XVII.

Cancrum extirpare Hercules profecto labor est



est, & quisquis hoc aggreditur, sollicite expendat, quantum onus subeat. Imo vix aliud hic praesidium, quam ferrum & ignis superest. Extremis quippe morbis, monente jamdum *Hippocrate Sect. I. Aph. 6.* extrema debentur remedia. Equidem *Riverius Cent. I. Obs. 97.* gloriatur, tumorem cancrum, labium superius obsidentem, in viro nobili a se percuratum ac resolutum fuisse, ope imprimis extracti helleb. nigr. & Unguent. de ran. viridibus. Ita & *Sculdet. in Armament. Chirurg. Obs. 55.* exemplum affert cancri mammaram incipientis perfecte discussi ac sublatis, per usum internum potio- nis melanagogæ (quam pariter extract. helleb. nigr. ingre- diebatur) externamque cerati Prævotiani, ex farina milii pa- rati, applicationem. Sed raro similis successus idem ten- tantibus obtingit. Quare ut plurimum ad sectionem Chirurgicam confugiendum est. Neque tamen & hæc ubivis locum habet. Proprie enim cancro occluso ad- huc, seu nondum exulcerato debetur. Feliciter tamen aliquando in ulcerato quoque sectionem cessisse, testantur *Hildan. Cent. VI. Obs. 22. Scultet. in Armament. Chirurg. Obs. 52. Muralt. in Opuscul. Chirurg. Obs. 49. p. 247.* Interim & in occluso, antequam excissio tentetur, probe dispiciendum, an ægra desideret, viribus adhuc constet, an tumor cancrum sit mobilis adhuc, atque ita compara- tus, ut sectione radicitus auferri valeat? Quæ cir- cumstantiæ si ausui huic favere videantur, intrepide tunc hoc, utut horrendum remedii genus, efficacissi- mum tamen & fere unicum, adhiberi poterit, plures- que de felici ejus successu prostant observationes v. g. apud *Hildan. Cent. II. Obs. 78. Cent. III. Obs. 87. Amat. Lusitan. Cent. III. Curat. 32. It. in Act. Hassn. Vol. I.*



*Obs. 27.* Quod si vero tumor cancerosus musculis subjacentibus pectoralibus & intercostalibus, imo ipsi peristio costarum firmiter annexus & quasi infixus hæreat, aut vicinas glandulas axillares simul infecerit, cacoehymia insuper universalis enormior præsto sit, viresque jam valde exhaustæ fuerint: tunc consultius sectio omittitur, & dissuadet eam in ejusmodi casu ipse *Hildan. Cent. 1. Ep. 40.* imo male cessisse testatur *Sculter. Armament. Chirurg. Obs. 54.* Ubicunque enim partes corruptæ funditus auferri non possunt, ibi malum pristinum expectatione citius & majori cum atrocità recrudescit, cujus rei notabile specimen, de Clitoride cancerosa infelicitè exsecta, exhibet *Petermann. Manud. ad Prax. Med. Cap. 5. §. 37. p. 84.* & plura quoque exempla tragica refert *Plater. Observ. Libr. II. pag. 528-533.* it. *Marchett. Observ. 29.* Ipsam vero operandi rationem fuse satis exponit *Aræus de Vuln. Cur. Libr. II. Cap. 3.* atque ex eo *Sennert. Prax. Libr. IV. P. III. Sect. I. Cap. 6.* succinctius vero describit *Horn. in Microtechn. Sect. II. P. I. §. 19.* it. *J. T. Brem. in Operat. Chirurg. Nuckian. Experim. 30.* Omnium optime vero cum enchiresibus & instrumentis necessariis illam tradit *Corn. Solingen. Libr. II. Cap. 4. p. 202. seqq.*

### §. XVIII.

Sunt, qui loco sectionis, remedii, ut ajunt, nimis crudelis, medicamenta caustica & escharotica ex mercurio, antimonio, arsenico parata commendant, v. g. *Poter. Cent. II. Obs. 53. & 58. it. Cent. III. Obs. 15. P. J. Faber Myrothec. Spagiric. L. III. c. 16. & Chirurg. Spagir. Sect. III. cap. 17. J.*



17. *J. Agricol. Not. in Popp. Part. I. p. 171. & 736.* Imprimis autem celebris fuit pulvis contra cancrum *Antonit Fuchsi*, Itali Medici Norimbergensis, qui tantam hoc ipso famam sibi peperit, ut communiter *Il Medico del Cancro* salutaretur. Hunc pulverem sibi ab ipso autore *Stadæ* ostensum esse scribit *Rod. a Castro de Morb. Mulierum Part. II. Libr. I. cap. 22. p. 145.* fuisse illum coloris cinerei, valde ponderosum adeoque procul dubio metallicæ profapiæ. Imo genuinam ejus descriptionem, cum Arcano contra cancrum *Penoti* propemodum coincidentem, sese obtinuisse testatur *Hildan. Cent. VI. Obs. 81.* Totam autem compositionem & applicandi methodum prolixè exponit *Sennert. Prax. Libr. IV. Part. III. Sect. I. cap. 6. p. 502.* illum conflare asserens ex arsenic. alb. per Spirit. vin. correct. ℥j. rad. dracuncul. maj. pulverisat. ℥ij. fuligin. splend. ℥iij. hæc accurate mixta per annum ad minimum asservanda esse, antequam in usum trahantur. Ut ut vero talia in ulceribus cacoëthicis locum, imo interdum usum evidentem habere possint; in Canero tamen serio illa disvadet *Hildan.* adductis in eam rem quamplurimis tragicis exemplis, *Cent. VI. Obs. 22. 80. 81. & Tract. de Gangræn. & Sphac. Cap. 5.* cui suum quoque calculum adjicit *Barbette Chirurg. Part. II. Libr. I. Cap. 13. p. 130.*

## §. XIX.

Curatio præservatoria, quæ tumoris cancrofi velox incrementum, aut exitialem ulcerationem præoccupare studet, tria potissimum requirit, universalis dyscrasiæ humorum correctionem, copiosioris ad partem affectam affluxus aversionem, sollicitam emollientium pariter ac irritanti-



tantium fugam. Exequimur hæc per mitiora laxantia, blanda diaphoretico-diuretica, sive sanguinem purificantia, circumspectam fluxus menstrui promotionem, tempestivas venæsectiones, & prudentem topicorum modeste repellentium ac discutientium usum.

## §. XX.

Inter laxantia a plerisque Practicis hic extolli, aliisque præferri solet Helleborus niger, in humoribus crassioribus, & veterum stylo melancholicis, evacuandis inprimis perutilis, adeo ut sint, qui hujus remedii ope cancrum incipientem interdum perfecte eradicari posse, sustineant. Confer *Observationes* superius §. 17. ex *Riverio* & *Sculeto* allegatas, ut & *M. N. C. Dec. III. Ann. I. Obs. 1.* ubi contractura inveterata & tantum non desperata solo usu extracti hellebori nigri prodigiose veluti persanata traditur. Datur autem commodissime, vel in forma extracti cum Mercur. dulci & levi stimulo ex resin. Jalapp. in pilulas redactus, vel in infuso aut decocto cum fol. Senn. rad. Rhabarb. polypod. Cichor. herb. Epithym. Capill. vener. aliisque aperientibus sociatus, quo spectat helleborismus Matthioli, a *Red. a Castro de Morb. Mulier. Part. II. Libr. II. Cap 3. p. 187.* descriptus & correctus.

## §. XXI.

Dyscrasiæ humorum acido-viscidæ corrigendæ inserviunt, & lymphæ ac sanguinis recrementa per diuresin & diaphoresin eliminant variæ Tincturæ Antimoniales, sive illæ ab



læ ab additis salibus aut ab ipso antimonio vires suas mutu-  
entur : Siquidem nota sunt magnifica Paracelsi de miri-  
fico amborum effectū promissa : quippe qui balsamum  
Samech seu sal Tartari edulcoratum omnium ulcerum  
malignorum domitorem appellat, Antimonium vero cor-  
pus humanum perinde ut aurum ab omnibus impuritati-  
bus repurgare asserit. Imprimis vero famam in hoc casu  
consecuta sunt decocta lignorum. Detur tamen opera,  
ut acriora illa & calidiora v. g. Gvajac. Sassafr. cum tem-  
peratioribus, rad. Sassaaparill. glycyrrhizæ &c. rite socientur,  
ne justam Martiani reprehensionem incurramus, qui illa  
ob nimiam exsiccandi facultatem huic affectui minus qua-  
drare existimat.

## §. XXII.

Habent hæc usum potissimum, ubi sensibiliores  
dolorum exacerbationes ingruunt, & possunt iis interpo-  
ni antimonialia fixa cum absorbentibus & cinnabarinis.  
Quibus insuper maximum pondus addit, imo cunctis fe-  
re præponderat fluxus menstrui expeditio & revocatio.  
Constat enim multijuga experientia, quod malum hoc,  
quamdiu rite fluunt catamenia, minime ita præcipiti pro-  
gressu invalescat, quam quidem promptissime fieri suevit,  
simul ac vel per ætatem vel propter causas præternaturales  
fluxus iste penitus exsiccat. Id quod præter observati-  
onem supra ex *M. N. C.* allatam tribus exemplis confir-  
mat *Celeberrimus Wedel. Diss. de Cancro Mammarum §. 38.*  
*39. 41.* Tentetur tamen id ipsum quoque nonnisi remediis le-  
nioribus. Siquidem teste *Experient. Waldsebm. in Ann. ad Chir.*

D

Barbette.



*Barbett. p. 398.* omnia, quæ massam sanguineam fortius exagitant, cancro sunt infensissima. Facile enim universalis motus turgescfactorius massæ humorum inducitur, & loco speratæ revulsionis major ad partem affectam affluxus concitatur: id quod fortiora ista pollentia emmenagoga nunquam non præstant; imo etiam metam, cui proprie destinantur, menstrui scilicet fluxus reversionem rarissime attingunt, & plerumque obstructionis pertinaciam augent. Confer *Histor. Morb. Vratilav. grassant. Ann. I. p. 71.* Præterea dentur etiam huic scopo destinata remedia non nisi justis temporum opportunitatibus, i. e. circa illas lunæ phasés, quibus antea sanæ fluxum menstruum expertæ sunt. Monente enim jamdum *Waleo Metls. mendend p. 87.* alienis temporibus exhibita, effectum destituuntur, si leniora sunt; si fortiora, periculum creant gravissimum, sed cum hæc alterius sint loci; non diutius iis immorabimur.

### §. XXIII.

Quod si vero, ut non raro contingit, nulla hujus excretionis naturalis revocandæ spes supersit, aut ipse fluxus impeditius & parcius procedat; necessariae utique sunt sanguinis ventilationes artificiales, per venæsectiones in pedibus, si fieri possit instituendas, & juxta *Celeberrim. Volckammeri monitum, Observationi 76. Ann. ultim. Dec. II. Ephem. N. C. adjectum*, quater in anno, aut ad minimum bis circa æquinoctia repetendas. Neque enim hic illos audiendos existimo, qui venæsectiones hic inutiles aut plane noxias censent, aut delectum partium inferiorum præ superioribus saltem dederint. Hos etenim vel unica



*Foresti observatio* solidissime refellit quam *Libr. XXVIII. Obs. 3.* recenset, ubi juvencula rustica ex venæsectione ipsis catameniis fluentibus administrata eorundem suppressio- nem incurrit, & postmodum singulis periodis mensis ru- is palpitationem molestant, in brachio illo, ubi ve- na fuerat secta, persensit; sola tamen venæsectione in talo- tum ab hac molestia, tum a suppressione mensium libe- rata fuit. Præter venæsectiones vero possunt etiam quando- que usum habere fonticuli, in his præcipue subjectis, quæ antehac ulcera multum manantia in aliis partibus diu ge- staverunt & post horum occlusionem malum hoc incur- rerunt.

## §. XXIV.

Topica sint moderate repellentia & discutientia, v. g. Succ. cicutæ, solani sempervivi, herb. Roberti. f. Ge- ranium, aqua ex similibus per alembicum plumbeum destillata, juxta *Hildan. Cent. I. obs. I.* Saccharum saturni in prædictis succis aut aqua solan per multiplici a coho- bia parata solutum, cataplasma ex cochleis & cancris vi- vis contusis, linimentum ex luto, quod in cote, dum ferrum acuitur, colligi solet a *B. Langio* commendat. in *Chirurg. Libr. 4. obs. 5.* oleum rosaceum diu in mortario plumbeo, donec nigrescat, tritum, & cum cerussa ac lithargyr. remixtum; imo omnia fere ex plumbo parata, emplastr. Saturnin. Mynsicht. diampompholyg. de ranis cum Mercur. vigon. miraculos. seu saponat. Barbett. ce- ratum de farina milii Prævotii, quod *Fabr. ab Aqua- pend.* in acceptis ferre scribit in *Medic. Paup. p. 738.* & plenius exponit inter remedia sua secretiora p. 25. Im-  
D 2 primis



primis vero a Paræo laudatur lamina plumbea tenuior imposita, & referunt *Ephem. N. C. Dec. I. An. 4. obs. 161.* ejusmodi laminam plumbeam per duos menses gestatam, in medio erosam, atque in pulverem albicantem redactam fuisse. Addunt nonnulli Mercur. vivum, quo talem laminam illinunt. Sed male id aliquando cessisse scribit *Barthol. Cent. I. hister. 7.* ita ut non solum cruciatus inde adaucti fuerint, sed & aperto postmodum tumore, tum ex ipso ulcere tum ex scapulis magna argenti vivi copia exsudavit. Discutientia v. g. Spir. Vin. camphorat. saltem eminus & in circumferentia, non ipsi tumori applicentur. Emollientia vero ac suppurantia cane pejus & angue fugienda sunt. Nam certo certius cancerum occultum inulceratum h. e. affectum tolerabilem in malum immedicabile convertunt, id quod *Hildan.* variis funestis exemplis confirmat *Cent. I Obs. 89.* & huc potissimum effectum *Hippocratis* pertinere existimat, quod habetur in *Aph. 38. Sect. VI.* Quibus caneri occulti nascuntur, non curari præstat: curati enim subito intereunt; non curati vero diutius vivunt vid. *Hildan. Cent. III. observ. 87.*

### §. XXV.

Mitigatio Caneri exulcerati tria involvit dolorum atrociorum lenitionem, fætoris & hypersarcomatosos cohibitionem, hæmorrhagiæ, si quando violentius erumpat restrictionem. Obtinemus hæc, aut intendimus ad minimum, partim per interna, partim per externa remedia. Interne conveniunt supra jam laudata blanda laxantia, absorbentia




bentia, inter quæ præ reliquis Cryſtall. mont. præparata commendari ſolet, cum antimonio diaphoret vel ce-  
ruſſ. antimon. & tantillo cinnabaris. Sæpe etiam dolo-  
rum ferocia anodyna requirit, & quidem doſi ut plurimum  
auctiori aut ad minimum repetita, qualia exempla pro-  
ſtant apud *River. Prax. Libr. XV. Cap. 19. Tulp. Libr.*  
*IV. obſ. 38.* Externe ad dolores complacandos a quam  
plurimis miris effertur laudibus unguent. de ran. virid.  
deſcriptum a *Riverio, Cent. I. Obſ. 97. it. a Rod. a Caſtro*  
*de Morb. Mul. P. II. Libr. I. Cap. 22. p. 134.* nec non  
Cerat. Oxelæum & liniment. ſimpl. *Sculdet. Obſ. 52. &*  
*56.* commendatum, porro pulvis ex amalgamate plum-  
bi & argent. vivi cum tantillo mercur. vitæ concin-  
natus, cujus præco eſt *Tulp. Libr. I. Obſ. 47.* Inſer-  
viunt etiam huic ſcopo flores zinci, Magiſter marcaſit.  
nihil. alb. & pleraque ſaturnina. Memoratu dignum eſt,  
quod refert *Maur. Cordæus Comm. 7. in Libr. I. Hipp.*  
*de Morb. Mul.* de fœmina nobili, cancro exulcerato to-  
tam faciei dextram partem occupante, obſeſſa, ſummisque  
doloribus miſere excruciatâ, quæ, cum variorum Medi-  
corum tam indigenarum quam exterorum conſiliis & au-  
xiliis nec quicquam levâri potuiſſet, tandem ſimplici hoc  
a vulgari barbi-tonſore ſubminiſtrato remedio convalu-  
it: pullos gallinaceos in partes tenues & latas conci-  
debat, quas ſæpiuſcule commutando ſubinde parti affe-  
ctæ admovebat. Unde non ſolum dolores ſedati, ſed  
ipſa quoque perfecte reſtituta fuit. Ad fœtorem fœ-  
damque hyperſarcofiſin coercendam vix efficacius proſtat  
remedium quam aqua calcis vivæ cum tantillo Mercur.  
ſublimat. Hæmorrhagias vero violentius erumpentes præ-  
ſentiſſime compeſcit ſpirit. Vin. rectificatiſſ. qui non im-  
merito poſitive adſtringentibus in hoc caſu præferendus.



Conf. Magnif. Dn. Doct. Bobnii, Patroni & Præceptoris  
 mei ad urnas colendi Programm. de Arcan. Med. Diss. de  
 cholera præmiss. Imo quandoque solius aluminis in aqua plan-  
 taginis soluti applicatio tepida, miram hoc in passu præstat  
 efficaciam. Laudant alii ad ulcus sordidum detergendum  
 sal fuliginis vel stercus humanum combustum, alii bal-  
 samica interponenda suadent. v. g. solutionem myrrhæ  
 in ovi ad duritiem cocto deliquescentis, vel ipsius tin-  
 cturæ cum essent. Succini, sed poterunt præ-  
 dicta, si prudenter usurpentur, suf-  
 ficere.

S. D. G.





LECTORI BENEVOLO  
FACULTATIS MEDICÆ  
LIPSIENSIS

p. t.

PROCANCEL-  
LARIUS  
D. IOHAN. GVILIELMUS  
PAULI,

ANAT. & CHIRURG. P. P.  
S. P. D.



LECTURE NOTES

PACUETATIS MEDICAE

LIPSIENSIS

18

PROF. CARL

LARIUS

D. JOHANNES GILBERTUS

PALLI

ANNA & CAROLUS P. G.

2 A. G.





J. J.

**I**nter omnes solidas corporis animalis partes, quanto frequentiores deprehenduntur glandulæ, quantoque frequentior harum mentio injicitur, tanto spissioribus tenebris earundem conformationem ac diversitatem esse circumfusam, vel ex ipso Clarissimorum Anatomicorum & Physiologorum de talibus luculenter elucescit dissensu. Dissensum equidem fusius nolo nunc commemorare, quem magni nominis Viri, *King, Malpighius, du Verney, Bellinus, Bidloo, Pitcarnius, Viennessens, Boerhaave, &c.* de glandularum structura in genere inter se foveant; nec, in quantum circa discrepantiam eorum a *Sylvio, Stenone, Graafio*, celeberrimis experientissimi *Loftius, Beddevoles, Nuckius, Ruyschius*, recedant. Prorsus tamen in tactum relinquere nequeo, dum ex tot famigeratissimorum Virorum cum dissensu, tum consensu, materiæ adeo obscuræ obscuram præferre facem in præsentī annitor, veniam & informationem ab oculatioribus, ubi caligavero, haud difficilem mihi promittens. Scilicet quo caligo circa generalem glandulæ texturam quodammodo dissipetur, ante omnia unanimis Recentiorum consensus videtur supponendus, quo glandulæ in genere non aliud, quam colatorii & filtri decernitur munus, huic jam exe-



quendo quia non nisi conveniens pororum habitudo valet debet-  
que concipi, ex ipsa tali omnem glandulæ conformationem in  
genere resultare protinus clarescit, sive glandula ipsa fluido alicui  
solummodo transcolando, sive ab altero potius fluido sequestran-  
do, cum industrio *Nuckio* afferatur in specie inservire. Hinc  
quoniam ingeniosus *Pitcarnius* nonnullique pororum ejusmodi  
glandularum cum fluido, vel transmittendo, vel secernendo,  
convenientiam majori probabilitate in sola magnitudine indagant,  
hoc magis figura, quam plerique alias simul cum magnitudine in  
hoc negotio respiciunt, poterit seponi, quo promptius crassio-  
res etiam humores a tenerioribus sic secerni posse postea demum  
exponam, quam specialiore pororum texturam glandulæ, tum  
transcolantis, tum separantis, ad *Nuckii* & *Bellini* ductum, cum  
varia utriusque differentia, indigitavero. Solertissimi namque  
*Nuckii* observationi exactiori debetur, quod porositas glandula-  
rum, quas conglobatas appellant, a textura fibrosa, veluti mu-  
scosa, promanet, eaque intercedente lymphæ, per lymphatica  
adducentia quæ accedit, per lymphatica vasa alia reducentia re-  
meet transcolata subtilior, exemplo glandularum mesenterii ma-  
nifestissimo. Hasce autem inter glandulas conglobatas quemad-  
modum, præter alias notissimas, pinealis glandula ob vasa lym-  
phatica, quæ duplicis generis perspicacioribus in illa cernere li-  
cuit, jure meritoque a laudato *Nuckio* refertur, ita & pituitaria  
singularem invenire videtur locum, quod corpus spongiosum,  
i.e. fibrosum, texturæ tenuissimæ a *Vieuassenio* annotetur, atque  
lympham per infundibulum a cerebri ventriculis acceptam fil-  
trando ad venosos sellæ turcicæ sinus transmittere a Clarissimo  
*Litre* ostendatur, etiam si vasis proprie dictis lymphaticis, cum  
advehentibus, tum revehentibus, destituatur. Sique conglobatæ  
ejusmodi glandulæ a lymphæ transcolatione, cui vacant, lym-  
phaticæ merentur cognominari, nullum video impedimen-  
tum, quo minus lien quoque, glandulæ renales sive ad ple-  
xum ac thyroideæ, structuræ fibrosæ sanguinisque transcolati-  
onis intuitu, cum *Rayschio* nunquam satis commendando, san-  
guineæ debeant saluari. Tum ad simplicissimam glandulæ  
secer-



secernentis structuram properanti vix aptius hæc videtur definienda, quam acutissimus *Billinus* fecit his verbis: formari glandulam posse, si a summo ramo arteriarum, vel etiam a quacunque parte ramorum aut trunci deducatur canaliculus non conicus, neque emittens ramos, sed cylindricus & vel advolutus in spiram, vel plicatus in plicas, vel saltem extensus per convenientem longitudinem, atque per totum ambitum multis foraminulis pertusus &c. Qualem conformationem quia præ se ferunt omnes glandulæ, quas *Ruychio* spurias vocare placet, veluti non nisi arteriolarum extremitatibus constantes, v. g. in cerebro, œsophago, ventriculo, intestinis, hepate, renibus, testiculis, utero &c. sequitur evidenter, hæc glandulas, si solæ occurrant, v. g. in tunicis glandulosis, omnium esse simplicissimas ac mere vasculosas, si vero sub membrana ambiente cum substantia alia folliculari aut saltem spongiosa conjungantur ac in canaliculos excretorios, modo breviores, modo longiores, abeant, glandulas magis compositas seu vasculoso-vesiculares efformare, sporadicarum demum, congregatarum conglutinarum & conglomeratarum titulo venientes. Glandularum sporadicarum intestini re-  
cti *Peyerus* meminit, descriptio vero earum, ad quam provocat, in *Willisio* frustra quæritur, a *Ruychio* nihilominus cum foveis sive folliculis exprimitur. Neque absimilem structuram intestinorum tenuium glandulis congregatis, a *Pechlino*, *Listero* & *Peyero* memoratis, laudatus *Ruychius* vindicat, dum texturam follicularem in glandulis, quæ circa labia & buccas, atque sub palato congregantur, *Malpighius* pariter distinctius evolvit. Conglutinarum glandularum nomen tonsillis atque prostaticis a *Loessio* inditur, quod utræque e pluribus simplicioribus ita conglutinentur, ut exteriorem superficiei partem satis æqualem, interiorem vero, qua cavitatem oris vel urethræ spectant, multis sinibus pertusam exhibeant. In glandulis denique conglomeratis, sive secundum *Schelhammerum* congestis, major simplicissimarum glandularum atq; longiorum canaliculorum excretoriorum numerus cum substantia folliculari aut saltem



spongiosa conglomeratur & congeritur, quam in præcedaneis. Folliculosa ipsarum compages a *Malpighio*, spongiosa vero a *Vienf- senio* innuitur, ac alterutra ex magnitudinis incremento, quod notabile capiunt, quoties uberior status vel aqua in canalem earundem excretorium vel in arterias tubuli medio impellitur, colligitur certissime. Canales vero excretorii, per quos fluidum secretum aliorum amandant, quia certiores haud dubie istarum constituunt characterem, quam superficiei inæqualitas, nihil obstare videtur, quo minus hepar, renes & testiculi, ratione excretoriorum ductuum, æque glandulis talibus accenseantur, ac glandulæ salivales, pancreas, cerebrum &c. quibus inæqualis est superficies. Thymus certe quamvis superficiem inæqualem obtineat, ob peculiaris tamen canaliculi excretorii defectum frustra glandulis conglomeratis annumeratur; nec potiori jure glandulis conglobatis accensebitur, quod vasa ejus lymphatica non nisi unius generis innotescant, ad ductum thoracicum tendentia & valvularum consuetarum expertia. Ceram quandoquidem in humanum ductum thoracicum infusum promte per notabilia lymphatica ad thymum excurrere post *Clariss. Comperum* ipse tribus abhinc annis in publica cadaveris foeminei dissectione vidi aliisque ostendi. Quomodo *Compero* autem exinde inferre detur, thymum in foetu & junioribus subjectis, veluti majorem, peculiare chyli constituere diverticulum, haud in propatulo est, cum modus oppido lateat, quo chylus per easdem vias, per quas ipse vel saltem lymphæ continuo affluit, queat remeare; adeo scilicet thymus & conformationis & usus ratione inter omnes ambiguit glandulas. Superest, ut fidem datam liberem, quamque varie crassiores humores a subtilioribus secerni possint, explanem: primum fieri hoc poterit, si sanguis per arteriolas in folliculos appensos effundatur, effusi autem portio tenuior per poros proportionatos aliorum reducatur, parte crassiori relicta, prout *Satorini* pinguedinis separationem dilucidavit. Deinde idem obtinebitur, si fluidum a sanguine quidem secernatur subtilius, moram tamen neciendo crassitiem contrahat, vel quia lymphæ admixta

nunc



nunc 'per lymphaticorum' oscula absorbeatur', nunc ab aere i-  
pso abradatur, vel quia tenuioris etiam fluidi particulæ suc-  
cessive invicem combinentur, sicque crassiores efficiantur. Po-  
stremum fortassis in bile folliculari locum habet, cum hepati-  
ci pori bilis tenuissima cernatur, in folliculo autem fellis longi-  
ore mora notabiliorem, & crassitiem, & amaritiem contrahat,  
nullis interim vasis lymphaticis ab ista vesicula juxta *Nuckium*  
emergentibus. A quibus econtra in mammis v. g. & testicu-  
lis lymphæ videtur excipi, quo lacti & spermati virili spissior  
concilietur consistentia; quemadmodum ab aere in au-  
ribus, naribus, ore, trachea, &c. serum tenuius continuo diri-  
pi, crassiori magis & plus minus viscido superstite, inter omnes  
constat. Sed hæc circa abstrusissimam glandularum structuram &  
differentiam primoribus attigisse labris sufficiat occasione Disputa-  
tionis Inauguralis, quam de *Cancro*, *Mammarum* glandulas  
corripiente, *Nobilissimus & Clarissimus Vir Juvenis, Dominus*

**GEORGIUS FRIDERICUS RUTTENBERG / Lips.**

*Philosophiæ Magister & Medicinæ Baccalaureus*, crastina luce  
B. C. D. mascule est defensus. Hic quippe sicuti in Academia pa-  
tria præceptis Philosophiæ haud leviter imbutus ex Medicinæ Pro-  
fessorum & Doctorum manu ductione in Arte salutari egregie pro-  
fecit, egregiosq; profectus cum in examinibus, theoretico altero, al-  
tero practico, tum in lectione cursoria aliisque speciminibus Gra-  
tiosissimo nostro Collegio satis comprobatos dedit, ita & ex ipso  
conflictu disputatorio omnium applausu & suffragio dignus facile  
reputabitur Licentiæ in Medicina titulo ac honoribus, quos a Fa-  
cultate Medica modeste nuper petiit atque conferendos obtinuit.  
Cumque ad præviam hujus & submissam denominationem

*Serenissimus ac Potentissimus Dominus*, **DO-**  
**MINUS FRIDERICUS AUGUSTUS,**  
*Rex Poloniarum, Magnus Dux Lithuania, Russia,*  
*Prussia, Masovia, Samogitia, Kyovia, Wolhynia,*  
*Podolia, Podlachia, Livonia, Smolenscia, Serbia &*

*Czerni-*



*Czernichovia; Dux Saxonie, Julia, Clivia & Montium, Angria & Westphalia, S. Romani Imperii Archi-Marschallus & Elector, Landgravius Thuringia, Marchio Misnia, & superioris inferioris que Lusatia, Burggravius Magdeburgi, Comes Principalis Hennebergicus, Comes Marca, Ravensbergi & Barbya, Dynasta in Ravenstein, &c.* Domini meus longe Clementissimus, nomine *Reverendisissimi ac Celsissimi Principis & Domini, DOMINI MAURITII WILHELMI, Ducis Saxonie, Julia, Clivia, Montium, Angria ac Westphalia, Postulati Administratoris Episcopatus Martisburgensis & Academie hujus Cancellarii Perpetui, Domini mei Clementissimi, Procancellarii ad hunc actum vices clementissime mihi demandaverit, mecum constitui, Nobilissimo Domino Candidato Dissertatione finita promeritam Licentiam Doctoralia in Arte Medica privilegia & jura rite adipiscendi solenniter impertire.* Quam vero Panegyrim solennem ut splendidiorum presentia sua, *Magnificus Academiae Rector, Comites Illustrissimi, Amplissimi utriusque Reipublice Proceres, ut & florentissima Nobilissimorum Studiosorum Corona,* ne graventur reddere, ea qua decet humanitate rogo, omnem posthac occasionem cum Gratosissima Facultate Medica Nobilissimoque Domino Candidato avide arrepturus, tam insignem benevolentiam servitiis, officiis, studiis, red-  
hostiendi, P. P. Lipsiæ d. 14. Novembr.  
M DCC IX.

---

LITERIS BRANDENBURGERIANIS,